

Tovetumagana Yadi Leta Anavelu Pita Givetokilumina

Kivemala

Taidei Pita yana leta anavelu giimili ginau Yaubada yana yoo imiyamiya Loma yana ebaveimeya anafafali wagaidiya. Taidei fafali-dina yadi ebaveimeya wagaidiya ani tuwaina Paulo anatokwayabu nodi inau ada ivewala Keliso faine. Ada kaliva-dina moyaidi imadu vetumagana ani malinai vita ilulutovonidi Keliso anamuliya wagaine.

Pita yana leta nagona wagaine ani tovetumagana givewaledi gavaiyamu idadewa tova-nai badi keke totafalolo ikiveuloulolonidi Keliso anayegana iwaiwaina faina. Ada leta taide anavelu wagaine givewaledi gavaiyamu tove-wala fwayafwaya ida dewedi ekalesiya negenine. Faina adimwatuguya ani kaliva tufodi bade ive-vuyu nuwanuwa balana ivevewaledi. Ivevewala vaita dewa yuyuvana ani velemoena iwakana, e ada igaluvaluva ina nagoyedi ke dewa bwanene tulina tulina ina gugaiyedi. Taidei faina Pita giluwageyedi gavaiyamu ida dewadewa Yaubada yana vewala tunutunugina faina.

Kaduwe, tovetumagana moyaidi inuwanuwa vaita Yeisu gina maduyewa. Aku aimoina-mowa keke gida yegemo faina, kaliva tufodi ivonavona vaita afositoloyavo yadi ifufu ani au fwaya, ada Yeisu ani velemoena keke ginayewa. E ada Pita giifufuyedi Yeisu yana

yewa-vagila faine ada givona asevatudi. Kaduwe giluwageyedi ke inamiya yegayegadiyavo ada keke tamo gavana ina awaega gina siveyewadi yadi veseyana Yaubada nodi wagaine. E ada tova-nai Yeisu ginayewa babiya ani bademowa taudiyavo kikidewedewedi Banae faine.

Vona vesiule. (1:1-2)

Ide tovetumagana adaawaega Yaubada wagaine kana kidonau. (1:3-11)

Pita yana nunu yana vetokiluma wagaine ada yana ebamididi yana veimeya faine. (1:12-21)

Vona matawa tovewala fwayafwaya faidiya. (2:1-22)

Yaisu yana yewa-vagila faina. (3:1-13)

Pita yana vonavagadona ke vona anaebal-auyabu. (3:14-18)

¹ Iya Saimoni-Pita, Yeisu Keliso yana togugai ada yana afositolo seyana. Imiyavo vetumagana wavaina Yeisu Keliso wagaine au anafaiweya ime yama vetumagana, ani yaku vesiule wagaimiya. Banae yada Yaubada kadu adaTok-ibababala ani yana veuluva yegayegana ke yana dewa tunutunugina, e ada yada vetumagana-nai giveleda.

² Imi waawaawaegemi ke Yaubada ada yada Kauveya Yeisu Keliso wana alamanedi velemono. E ada taidei adialamana-nai wagaimiya faina, wa yadi nuwadoga ina lemelememi velemono ada kaduwe aseniwalova ina velevelemi.

Ide tovetumagana adaawaega Yaubada wagaine kana kidonau.

³ Yaubada Tauna yana toyogineya gaitoma moyaina iwakadi bade giveleda. Ada taidei gaitoma-dina ina lemelemeda e ada yana nuwanuwa anafaiweya kana dewadewa ada yawai-vagata kana miyamiyanena. Taidei analauboda faideya faina Banae kaalamanena. Banae yana veuluva iwaka-vagaina ke wa yana iwakana mamalina gimiyamiya, e ada gidouweda ke ide natunavo.

⁴ Ada Banae wa yana iwakana mamalina gimiyamiya ada yana veuluva iwaka-vagaina faina, bademowa yana vonadabadaba giveleda. Yana vonadabadaba-dina ani iwaka-vagaidi ke lakai-moedi, ada giveleda e ada ina veguwa aseasedeya ke wagaidiya adafaiweya kana veanafaiweya Banae. Taidei miyamiyanai ani meyameyaganina faideya faina babi anadewa koyodi ani bademowa kaosedi, dewa-dina koyodi kaliva babi matatabuna wagaine ikikiveyegemonidi yadi nuwanuwa itaitaluvadigadi wagaidiya-deya.

⁵ Taide vuvuna-nai faina, imi bademowa wa yami vetumagana wamiyamiya aku wana vedivediwe ke dewa yegayegadi ani yami vetumagana nodi wana vetuvetutamwaina. Ada kaduwe Yaubada anaalamana ani dewa yegayegadi nodi wana vetuvetutamwaina.

⁶ Ada taudeyavo adaawata ani Yaubada anaalamana nodi wana vetuvetutamwaina. Ada kadu atuvefaila ani taudeyavo adaawata nodi wana vetuvetutamwaina. E ada Yaubada anavemoimoina ani atuvefaila nodi wana vetuvetutamwaina.

⁷ Kaduwe badi Yaubada yana yoo, taine

tubuiyamiyavo, ani wana nuwakabubuyedi, ada taide adinuwakabubu-nai ani Yaubada anave-moimoina nodi wana vetuветutamwaina. Kaduwe kaliva moyaidi wana nuwakabubuyedi, ada taide adinuwakabubu-nai ani tubuiyamiyavo adinu-wakabubu nodi wana vetuветutamwaina.†

⁸ Faina kai dewa-dina bademowa wana mulimuliyedi ke ina vegaitoma lakaina wagaimiya, aga yada Kauveya Yeisu Keliso anaalamana wagaimiya ani keke ginamiya-kavokavovo, keke. Aiyada gina veguwa e ada Banae yana gugai wana gugaiye-dewedewena.

⁹ Aku gavakaliva taine dewa-dina keke ida miyami wagaine, ani bana yana nuwanuwa giyuyuvana, e ada vaita matana koyomoena. Faina yana dewa-dina koyodi tuwaina gifaisewadi ani Yeisu bademowa adibwanenenai gikiveyegayeganena banae wagaine, aku au nuwana givulu.†

¹⁰ Aku tubuiyakuweyavo, Yaubada bademowa givenuwadadanemi ada gidouwemi ke Tauna yana yoo wana miyamiya. Taidei faina taine dewa-dina ani wana vedivediwe ke wana gugugaiyedi e ada amivenuwadadana ke amivedo wana kidonedi. Kai taidei anafaiweya wana miyamiya aga keke-mowa Yeisu yana wai wana miyasege ke wanabe koyona wagaine.

¹¹ E ada Yaubada wa yana vemwamwala lakaina gina vagaulemi wanaluku Yeisu Keliso yana ebaveimeya miyamiyani-vagaina wagaine. Banae yada Kauveya kadu adaTokibababala.

Pita yana nunu yana vetokiluma wagaine ada

† 1:7 Gal 5:22-23 † 1:9 1Iyo 2:11

yana ebamididi yana veimeya faine.

¹² Aku nuwanuwa-dina gaifufuyedi** ani bademowa waalamanedi, ada Yaubada yana nuwanuwa velemoena wagaimiya bade waabidonau wagaine. Aku au nuwanuwaku tova moyaina nuwami gana talatalamutudi.

¹³ E ada yaku tova aimo gamiyamiya taide vovokuya vaita vada anafaiweya,** aimo nuwami gana talamutudi ke gana ivenuwanuwami gaitomadina gaifufuyedi faidiya. Taidei iwakana faimiya.

¹⁴ Taidei anafaiweya gavona faina gaalamana keke tova manamanawena ada vovoku gana miyasegena, anafaiweya yada Kauveya Yeisu Keliso gikivemalina wagaikuya.

¹⁵ Tainei faina ganuwanuwa lakaina yami wai gana kidewedewena muliya-yo yaku miyasega, e ada aimo gaitoma-dina matatabuna gaifufuyedi ani wana nuwaveyalaidi.

¹⁶ Faina tova-nai ime afositolo nuwami akivemalina yada Kauveya Yeisu Keliso yana toyogina lakaina ke yana yewa-vagila faina, ani keke adavona-kavokavovo. Keke ada vevewalemi ifufu keke wa vuvudi iyegeyegemona kaliva taudiyavo yadi nuwenuweya, keke. Aku ime toitavedama, faina matameya-mwaeya Yeisu wa yana toyogina ke wa yana iwakana mamalina au velemoena aitana.

** **1:12** Pita yana nuwanuwa-dina giifufuyedi ani adinuwanuwa giyewa ginau 1:3-11. ** **1:13** Keke tova manamanawena kaliva ina miyamiya vada wagaine, ada kaduwe anafaiweya ideyavo keke taide babi anavovo wagaidiya kanamiya-vagata. Taidei faina Pita vovoda givonaveluveyedi vada wagaidiya. (2Kol 5:1,4)

17-18 Tuwaina ime Yeisu nodi oya-nai tabutabuna wagaine amiyamiya aku Yaubada Tamada ani Yeisu anayegana gikilakaina ke gikivekaikaiwabuna. Yaubada wa yana iwakana mamalina ada wa yana veimeya givona Yeisu faine, givona, “Taidei ani Iya Natu aseaseku. Banae gikivemwamwaliku lakaina.” Taine yana vona-nai gabameya giyegemona ani taumeyavo anogalina.**

19 Taide gaitoma-nai giyegemona wagaimeya ani yama vetumagana gikivetoyogina, e ada Yaubada yana falofitayavo yadi vona tuwai-moena ivonaye-vagaidi ani avetumaganena velemono. E ada gilubodami yadi vona-dina wana vevenogaledi. Kai yadi vona-dina wana kidonedi aga wada iwakana, faina yadi vona ani vaita malina yuyuvana gituituimalina.† Taide anafaiweya wana nogala-dewadewa, e ada yadi vona anamalina gina tuituimala aseasemiya ginanau ginanau-deeya, Yeisu yana yewa-vagila anatova gina yegemona. Ee, yana yewa-vagila anatova-nai ani anafaiweya mala gilavulavuna ada Ilauwala gilakalaka.**

20 Aku gaitoma lakaina seyana wada alamanena, taine falofisai matatabuna Buki Tabu wagaine ani keke seyana gaito anafata tauna yana alamana gagana wagaine ananuwamamala gina alamane, keke.

** 1:17-18 Pita giifuifufuyena tova-nai Yeisu anaita gisevedav-edama ke gilunamanamalena. (Mad 17:1-8, Mak 9:2-8, Luk 9:28-36) † 1:19 Iyo 5:35 ** 1:19 ‘Ilauwala’ ananuwanuwa taidei maita-nai wagaine ani givonaluvefosau Keliso ada yana tova yewa. (Ive 22:16, Naba 24:17)

21 Faina keke tamo tova kaliva yadi nuwenuweya falofisai gida yegemo, aku Aluwaluwa Tabuna gialaveleveledi mamauwe Yaubada yana vona iawatalatalainedi.†

2

Vona matawa tovewala fwayafwaya faidiya.

¹ E ada waitana, tuwaina meIsileli wagaidiya badi Yaubada yana falofita velemoedi imiyamiya, aku kaduwe falofita fwayafwaya badi wagaidiya imididi ada kaliva ifwayadi Yaubada yana vona faine. Ada kaduwe anafaiweya imi amimwatuguya gina yegemona. Tovewala fwayafwaya ina mididi amimwatuguya aku keke wana inanadi, ada yadi vewala baladi ikikivekoyo ani ina sewavuyena vona iwakana wagaine e ada taidei wagaine kaliva ina fwayadi.† Au yada Kauveya yana alika wagaine yadi koyona fatana gisena ke badi yana yoo,† e aku ivedomobubusena. E ada taudiyavo yadi dewa-dina ina gugugaiyedi aku keke tova manamanawena ada agolaufofola ina nuwagana.

² Badi tovewala-dina ani vovo ananuwanuwa faina keke maita taudiyavo ida awatadi, aku dewa bwanebwanenena galuweta ke bawe yadi dewa anafaiweya idewadewayena. Ada taidei yadi dewa-dina ani kaliva tufona moyaidi ina mulimuliyedi, e ada mali kaliva ina itadi ke nuwanuwa velemoena anawai ina awavekoyoyena.

† 1:21 2Tim 3:16 † 2:1 2Vei 13:1-5, Mad 24:24, Iyud 4 † 2:1 1Kol 6:19-20, Gal 3:13, 4:4-5, Ive 5:9, 1Pi 1:18-19

3 Ada badi tovewala-dina aseasediya iamoumoula e ada ina veseba wagaimiya ke yami mani wana veledi.† Aku tuwaina-deya Yaubada giveimeya adimatavuloga faina, ada aimo veimeya-nai gimiyamiya. Adiagolaufofola faina Yaubada bade gikidewedewena ke gibodaboda faidiya.

4 Wana nuwaududuna. Tuwai-bulubuluna Yaubada yana aneloseyavo tufodi ikoyona† ani gavaiyamu? Vaita badi wa yadi koyona-nai au Yaubada giita-moedi ada givonedi, givona, “Iwakana, wananau?” Aiyo? Keke, keke-mowa. Au gibatugedi eli wagaine, wadedeku yuyuvana bakibaki anaseini giyogodi. Ada yuyuvana wagaine imiyamiya analaba aimo vonayavuga anayadayada-nai wagaine.

5 Tainei anafaiweya tuwai-bulubuluna Nowa yana toveya. Kaliva moyaidi Yaubada keke ida matawalewaleye aku tova moyaina dewa koyona ifaifaisewadi. E ada badi tokoyona-dina ani Yaubada keke gidaita-moedi ke gida awaveiwakanedi, aku au giluyavuledi tuwa wagaine. Aku Nowa ke yana gabu adiseveni nodi ani Yaubada gikibababaledi.† Bana Nowa ani tova moyaina kaliva giifuifufuyedi dewa-dina yegayegadi Yaubada giawaveiwakanedi faidiya.

6 Kaduwe anafaiweya aimo melala lakaidi iluwei Sodoma ke Gomola, taidei melala-dina adikalivayavo tokoyona-mowa. Yaubada gitadi ada yana veimeya gisena faidiya ani aiyabeyabela wagaine badi yadi melala-dina

† 2:3 Lom 16:18, Tai 1:11 † 2:4 Iyud 6 † 2:5 Ibel 11:7, Eba 6:13,18, 7:23

nodi gikabu-yavuledi, e ada matatabudi iveavu.† Ada meSodoma ke meGomola wagaidiya ani Yaubada ebaita gifaisewana e ada kai kaliva nuwanuwadi Yaubada ina vedomobubusena, aga nuwadi gina malina vaita yadi dewa koyona analaufata ina nuwagana.

7-8 E, Sodoma ke Gomola adikalivayavo, ani tova moyaina veimeya moyaina iawaeggedi aku vovo ananuwanuwa bwanebwanenena wagaine iawaegge-vagaidi. Aku badi adimwatuguya ani Lota anakaibe yana dewa yegayegana, ada tova ke tova yadi dewa koyo-moena giitaitana kadu yadi vona koyodi ginoganogalidi wagaine, nuwavita anauloulolo ani lakai-moena bana wagaine. Taidei faina Yaubada Lota gimadu kibababalena muliya-yo melala iluwei giluyavuledi.†

9 Ee, anelose koyodiyavo ada Nowa ke Lota ifuifufudi wagaidiya ani kana nuwaveyalaina vaita yada Kauveya ani kaliva-dina yana wai imulimuliyena aku adigaluvaluva inuwanuwagadi ani gialamanena gavaiyamu Bana gina kibababaledi.† Ada kaduwe gialamanena gavaiyamu kaliva koyodiyavo gina kiabidi gina naunauwedi-deya vonayavuga anatova wagaine adimatavuloga ina nuwagana.

10 Taidei anafaiweya kaliva koyodiyavo moyaidi ina nuwagana, aku velemoena ani badi tovewala fwayafwaya-dina vovo ananuwanuwa wagaidiya iawaawaegge-moedi e ada galuweta ke bawe yadi dewa anafaiweya idewadewa.†

† 2:6 Eba 19:12-13,24 † 2:7-8 Eba 19:15-17 † 2:9 1Kol 10:13, Ive 3:10 † 2:10 Iyud 16,18

Ada keke maita nuwanuwadi Yaubada gina veimeyedi. Badi keke wa yadi vemoimoina ada keke ida nuwanuwa yadi gugai vilena faidiya, aku taudiyavo yadi nuwanuwa gaga ikikilakaidi kadu kaliva iitaitatagodi. Ee, aneloseyavo badi totoyogidi gabameya wa adiveimeya lakaina, ani biyavo-dina keke maita wa yadi matauta aku imadumaduvona awadamana wagaidiya.†

¹¹ Aku aneloseyavo ani tovewala fwayafwaya-dina itoyogisegedi kaduwe ikaiwabusegedi, nonogana keke-mowa maita wa yadi awadamana Yaubada matane ida awavekoyoyedi.

¹² Aku taide tovewala fwayafwaya-dina, ani gaitoma tulina tulina adinuwanuwa keke ida alamanedi aku au gaitoma-dina ivona awadamanedi. Waitadi, badi vaita kevakeva walawala keke wa yadi nuwanuwa anafaiweya.† E ada kevakeva itubuga e ani kaliva ina kiveyabidi ke ina luvealikadi, tayuwe anafaiweya tovewala-dina adiagolaufofola ina nuwagana.

¹³ Badi yadi dewa koyodi ikwagekwageyedi e ani fatadi kadu koyona ina nuwagana. Tova ke tova gufa toyogina iyuyuga ada dewa koyodi moyaina igugugaiyedi aku keke maita ida vovomumu faine. Au ivemwamwala yadi dewa-dina faidiya ke iawaawege-moedi wagaidiya, ada taidei ani keke bogi wagaine aku taumada yadeyadeya. Taudiyavo ialamanedi ikikivekoyo aku vaita yegayegadiyavo ielaelai ada nodi wakanikani kanibutu wagaidiya, aku badi yadi kivekoyo faina ivemwamwala

† 2:10 Iyud 8 † 2:12 Fip 3:19

velemoena.

¹⁴ Tova moyaina vevine wagaidiya matadi gidigagi-vagaina, ada keke maita yadi nuwanuwa ida luyabu dewa koyona adivegugai faidiya. Ada badi gavega Yeisu anavetumagana keke toyo-gina aseasediya, ani biyavo-dina wa yadi vefwayafwaya vaita mwau anafaiweya kaliva-dina nuwadi ivaivaidi e ada inabeu koyona wagaine. Badi aseasedi ivesikuluye-yabudi lugafugafu wagaine. Au Yaubada yana alatabutabu dibune imiyamiya.

¹⁵ Biyavo-dina wai tunutunugina ivedomobubusena ke ivuyo, ada Beoli natuna Belami ani tavagina imuliyena.** Bana Belami ani Yaubada yana falofita seyana aku nuwanuwana lakaina mani gina vaina faina, tauna giawaegena ke gidewa koyona.†

¹⁶ Aku yana gugai koyona faina, Yaubada giduweyena. Kaalamanena doniki ani keke adifata ina ifufu, aku tova-nai wagaine Yaubada doniki-nai gigai ke kaliva bonana wagaine giifufu falofita-nai wagaine e ada yana dewa kwavakwawa keke gina gugaiye. Ee, ada vona velemoena wada tovewala koyodiyavo yadi dewa ani Belami

** **2:15** Banae fafali-nai Mowabi anatoveimeya ani meIsileli gimatamatausedi, e ada matawa giimilina falofita-nai Belami wagaine ke ginaela meIsileli gina alatabutabuyedi. Ada Belami yana doniki giyagena ada ginaunau aku wai wagaine Yaubada yana anelose giyegemona, ada doniki-nai giitana e ada giilovau. Aku Belami keke anelose-nai gidaita e ada yana doniki gimununa, ada doniki giifufu Belami wagaine. Muline, Yaubada Belami matana gikibwadi e ada anelose giitana, ada anelose giduweyena. (Naba 22:1-25) † **2:15** Naba 22, 2Vei 23:4-5, Niy 13:2, Ive 2:14

yana dewa anafaiweya.

¹⁷ Waitadi, badi tovewala fwayafwaya ani vaita tovoga wagaine kaliva tova moyaina gufa ikoikoi, aku gufa-moena ani bade giyada. Kaduwe badi anafaiweya vaita buibui kaitaitadi ke kanuwanuwa vaita wei ginaobu, aku keke. Au mala gitafi alualugedi inau. Badi faidiya bademowa fafali iwakana Yaubada gikidewedewe-vagaina, ada wadedeku inamiya-vagata. Wada-nai eli anayuyuvana bakibaki.[†]

¹⁸ Wada adilauboda faina taudiyavo ikik-ilakaidi vaita evona gaitoma lakaidi iifuifu-fuyedi, aku velemoena iveseveseba ke kaliva ina ivenuwanuwadi vovo ananuwanuwa koyo-moedi moyaina faidiya. E ada tovetumagana evagudiyavo ivevuvu-mowa iotaota dewa koyodi wagaidiya, dewa-dina badi kaliva-dina inau-nau sidamana anawaiya ada idewadewayedi, ani badi tovewala fwayafwaya-dina ielaelai ke badi tovetumagana-dina ina sebodadi, e ada inayewa koyona anawaiya.

¹⁹ Tovewalayavo ivonediga, “Kai yama vewala wana muliyena, aga gavana yami nuwanuwa wanagana ani imi yavuyavumiyavo wana gugaiyena. Keke tamo gava veimeya gina kivevitami.” Taidei anafaiweya ivonavona aku velemoena ani ivefwayafwaya, faina badi taudiyavo ani keke yavuyavudiyavo ke gavana yadi nuwanuwa inagai, keke. Badi taudiyavo yadi nuwanuwa koyodi ke dewa koyo-moedi ani iyogoyogodi aseasediya, e ada togugai yogoyogodi imiyamiya. Faina kai gavana seyana

[†] 2:17 Iyud 1:9-13

giveiveimeya kaliva aseasena wagaine, ani ina kaliva-nai givetogugai-yogoyogona gaitoma-nai wagaine.†

20 Faina kai badi bade ialamanena Yeisu Keliso yada Kauveya, Banae gikibababaleda, e ada kai babi anadewa ikikivebwaneneda ani bademowa wagaidiya-deya iota-yabuyabudi, taine iwakamoena. E aku kai badi imiyamiya anafaiweya aku aimo inayewa-vagiledi ada koyona gina kiabidonedi ke gina toyogitagodi, kai taidei anafaiweya inadewa, aga muline koyona-nai ina miyamiyanena ani koyo-moena ayo koyona nagona imiyanena.

21 Kai dewa yegayegana anawai keke tamo tova ida alamane, aga wada koyona. Aku bademowa ialamanena Yaubada yana veimeya tabutabuna kaliva ivesesevedamadi wagaidiya, aku veimeyadina adimuliya wagaine imiyaviladi. Wada koyo-moena!

22 Yada vona matalivulivuna iluwei adivona velemono giyegemona velemono wagaidiya. Seyana givona, “Kai galuweta gina ovala, aga au ginanau-mowa tauna yana ovala wagaine ada gina kanina.” Ada kaduwe seyana givona, “Bawe ginatowa gufeya ke gina yegayegana aku kadu gina yewana fwayafwaya wagaine gina afiafitowa.” †

3

Yeisu yana yewa-vagila faina.

† 2:19 Iyo 8:34, Lom 6:16-17 † 2:22 Vona 26:11

¹ Tubuiya aseasekuweyavo, bademowa yami leta nagona gamaduvetokilumina, aku ida yaku leta anavelu gavetovetokilumina wagaimiya. Taine yami leta iluwei wagaidiya evona nuwanuwaku gana ivenuwanuwami

² e ada wana nuwaududuna gavana tuwai-moena Yaubada yana falofita tabutabudiyavo ivonaye-vagaidi. Ada kaduwe wana nuwaududuna veimeya-nai yada Kauveya kadu adaTokibababala givilemi ime yami afositoloyavo wagaimiya-deya.

³ Nago-moena nuwanuwaku wana alamanena vaita tova anaebalauyabu anayadayada-dina wagaidiya kaliva ina yegemona, ada taudiyavo yadi nuwanuwa itaitaluvadigadi gaga ina mulimuliyedi. Badiyavo keke wa yadi vemoimoina ada Yaubada ke yana yoo ina awaawaveleigedi.†

⁴ Ina vonaga, “Tuwaina Yeisu givonadabad-aba vaita ginayewa-vagilena. Aku gadegamenai Yeisu-moena? Tuwai-moena tamadeyavo nagona ialika ada gielai tova malinai, keke tamo gavana gida sevedavedama. Gaitoma matatabuna au imiyamiya anafaiweya Yaubada gibubudi mauwe ehavevuvu wagaine.”†

⁵ Taidei anafaiweya badi kaliva-dina keke wa yadi vemoimoina ina vonavona, faina gavana tuwai-moena Yaubada gigugaiyena ani keke nuwanuwadi ina nuwaududu. Tainei ani tuwai-moena Yaubada au givona ada gabama giyege-mona, kadu givona ke babi giyegemona gufa

† 3:3 1Tim 4:1, Iyud 1:17-18 † 3:4 Isik 12:27-28

wagaine-deya,[†] ada gufa-nai babi gififina.

⁶ Aku aimo wei lakaina gigai gilugaga ke babi gituwa afufuna, e ada gufa-nai gaitoma matatabuna giwatavudi ke giluveyawaliyedi.[†]

⁷ Aku gabama ke babi malinai imiyamiya ani taine Yaubada yana vona-nai gikikiveyabidi imiyamiya. Ada aimo gina kikiveyabidi-deeya, yana tova lakaina venuvenuwadadanina gina yegemona, ada aiyabeyabela lakaina wagaine ginakabu-tamwaidi. Ada yana tova-nai lakaina venuvenuwadadanina gina yegemona wagaine, badi kaliva-dina Yaubada ivedomobubusena ke yana wai iawaegegena, ani gina vevonayavugidi ke fata ginasena e ani agolaufofola ina nuwagana.[†]

⁸ Aku tubuiya aseasekuweyavo, gaitoma seyana keke nuwami ginavulu. Kauveya matane yadayada seyana ani vaita malamala wani tausani (1,000), ada malamala wani tausani ani vaita yadayada seya-moena.[†] Keke tamo aditulina Banae wagaine.

⁹ Yeisu yana vonadabadaba-nai yana yewa-vagila faine, kaliva tufodi inuwanuwa sidamana ke ivonavona, "Kauveya Yeisu yana vonadabadaba gina kiveyegemonina velemono faina ani givewalu-mowa." Aku velemono keke anafaiweya. Gibodaboda faina giatuvefailemi. Keke nuwanuwana tamo gaito agolaufofola gina nuwaga, e ada kaliva moyaidi gibodabodadi ke yadi dewa koyona wagaidiya ina nuwavilana

[†] **3:5** Eba 1:2,6-9, Sam 24:1-2 [†] **3:6** Eba 6:5 - 9:17 [†] **3:7** 2Tes 1:9 [†] **3:8** Sam 90:4

aku ina awaegedi Bana wagaine.†

10 Aku yadayada-nai Kauveya ginayewa-vagila ani velemoena ginaelai. Aku yana tova keke kada alamane e aku tokiyafu yana yegemo anafaiweya, yana yegemona kaliva gina vetataweyanidi.† E, Banae ginaelai anatoveya, gabama butuna gina lunununuga aku gina avovolina, ada kauwana, vaikoi, ke ailabama ina alaidi ke ina avaidi. Ada babi wa anagaitoma matatabuna ginaalai-yabudi.

11 Taide anafaiweya gaitoma-dina mwatugu wagaine ada babi wagaine inalaai-yabudi, e ada imiyavo ani gavaiyamu yawaimi? Wana nuwenuwena. Gilubodami kaliva tabutabudi anafaiweya wana dewadewa. Wana awaege-moemi ke wana seseliyemi Banae wagaine e ada yana nuwanuwa wana gugaiye-dewedewena.

12 Ee, Yaubada yana yadayada wana veitabodebodena aku taide anafaiweya wana dewadewa e ada yadayada-nai gina maduyegemona. Tayuwe yadayada-nai faine mwatugu ginaalai-yabuna, ada kauwana, vaikoi, ke ailabama matatabudi ani ina alaidi ina dewaya.

13 Aku mwatugu ke babi evagudi ani Yaubada bademowa givonadabadaba gina kiveyegemonidi, e ada kaveitabodebodedi. Wadedeku-deya toye-gayegana gaga ina miyamiya ke ina dewadewa Yaubada yana nuwanuwa anafaiweya.†

† 3:9 Isik 18:23,32, 33:11, 1Tim 2:4 † 3:10 Mad 24:43-44, Luk 12:39-40, 1Tes 5:2-9, Ive 16:15 † 3:13 Ais 65:17, Ive 21:1,27

*Pita yana vonavagadona ke vona anaebal-
aubyabu.*

¹⁴ Taidei faina tubuiya aseasekuweyavo, waveitabodaboda taidei gaitoma-dina ina yegemona aku wa yami idibumwaiga wana vediwe ke yami dewa ina yegayegana Yaubada matane, ada keke tamo gavakoyona wagaimiya.† Kaduwe wa yami aseniwalova wana miyamiya.

¹⁵ Ada vuvuna-nai Kauveya aimo keke gi-dayewa ani wada nuwenuwe-dewedewena. Banae wa yana atuvefaila gibodaboda e ada kaliva moyaidi yana kibababala ina nuwagana.† Taidei vona-nai tubuiya aseaseda Paulo kadu givetokilumina wagaimiya. Yaubada givelena nuwauya

¹⁶ e ada nuwauya-nai wagaine taide nuwanuwa-nai faine givetokilumina yana leta moyaidi wagaidiya. Velemoena ani, yana nuwanuwa tufodi yana leta wagaidiya ani adialamana vitana faideya. E ada kaliva yadi alamana keke ada Yaubada anamuliya wagaine yadi vetumagana walamina keke, ani yana vona ikivikivila koyodi ke vona-dina adinuamamala ivetoviviviyedi. Kadu anafaiweya vona velugadiyavo moyaidi Buki Tabu wagaine, adinuwanuwa ivetoviviviyena. Tayuwe anafaiweya yadi dewa faina, badi yadi wai ivunavunana taudiyavo adiagolaufofola faina.

¹⁷ Aku tubuiya aseasekuweyavo, gavonamatawe-vagaimi e ada taidei gaitoma-dina bademowa waalamanedi. E ada

† 3:14 Iyem 1:27 † 3:15 Lom 2:4

wana itaveyabimi aenanai badi kaliva-dina tova moyaina veimeya moyaina iawaegegedi, ani ina nuvuyoyemi yadi vefwayafwaya wagaine, e ada yami awaega Keliso wagaine ke yami vetumagana wakidonena ani gina aliuliuna ke wana segena.† Keke taidei anafaiweya wana dewadewa,

¹⁸ aku nuwami wana sevelavelalaina ke yada Kauveya Yeisu Keliso kadu adaTokibababala wana alamanena velemoena ke yana nuwadoga gina tubutubuga wagaimiya.† Banae anayegana kana kikilakaina malinai ada kadu tova matatabuna keke anaebalauyabu. Ika anafaiweya.

Iyayeku Pita

† 3:17 1Kol 10:12, Ibel 2:1 † 3:18 Efes 4:15, Kol 1:10, 1Pi 2:2

Yaubada Yana Veyavo Anawai Evaguna
The New Testament in the Bwaidoka language of
Papua New Guinea
Nupela Testamen long tok ples Bwaidoka long Niugini
copyright © 2024 Wycliffe Bible Translators, Inc.

Language: Bwaidoka

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-12-08

PDF generated using Haiola and XeLaTeX on 13 Dec 2025 from source files dated 12 Dec 2025

b5406fa0-0156-5dfd-bdb9-797516d75cf2